

Le livre des serfs de Marmoutier, Nr. 97

Nosse debebitis, si qui eritis posteri nostri Majoris scilicet hujus habitatores Monasterii Sancti Martini, Gimonem de Ambaziaco, mulierem quandam nomine Aremburgem uxorem quondam cujusdam Vitalis arte sutoris, sibi voluisse reclamare cum duobus filiis ipsius, uno mare, altera femina, pro eo quod Vitalem ipsum suum fuisse colibertum asseverabat. Sed eadem femina alterum praeter istum ante habuerat virum, nomine Guandelbertum, cum quo se nostrae servituti tradiderat, et tam ille servus quam haec ancilla Sancti Martini devenerat. Quod quia legaliter probari sibi Gimo petebat, ut aut probato hoc partem tantum suam haberet ex filiis quos illa de Vitale susceperat, aut si probari non posset, et matrem sibi pariter et totos filios colibertos acciperet; aliquanto tempore res dilata, alium tandem et meliorem sortita est finem. Nam postea Gimo centum solidis expostulatis, et ex his etiam nobis XXti remissis, acceptisque reliquis, seque ipso in participationem totius nostri deinceps benefacti recepto, tam feminam ipsam quam ambos ejus filios, quorum ut jam diximus alter erat masculus nomine Harduinus, altera femina Ledeardis vocata, cum universis ex eisdem postea nascituris, annuit atque concessit Sancto Martino in perpetuum habendos et nobis, guerpiens pariter quicquid ex rebus ipsorum reclamabat pro parte Vitalis. Et totum hoc quod fecit Gimo, auctorizavit Eudo de Blazone, de cujus tenebat ista fevo. Feminam denique ipsam, coram priore loci nostri nomine Odone et nostrum, aliquantis cum filio et filia presentatam, pro innovatione et recognitione deditionis illorum in servitium Sancti Martini et nostrum, suis capitibus fecimus singulos IIIor imponere denarios, quos inde productus prior noster accepit. Testibus istis: Ansegiso homine Sancti Martini; Sigemaro cellarario, Constantio Tallit Ferrum; Giraldo Muciolo; Giraldo coquo; Haimone coquo. De his autem quae pro servis isdem cum Gimone egimus et Gimo nobiscum, quoniam affuerunt hii testes esse debebunt: Gauscelinus rasorius; Brictius filius ejus; Herbertus Brito; Giraldu de Monte Laudiaco; Guarnerius major; Ingelbaldus de Ponte; Giraldu Muciolus; Rodulfus de Balgiaco; Ingelricus sutor; Guarnaldus tanator; Rotbertus hospitalarius; Giraldu coqus; Nihardus coquus; Urfio coquus; Bernardus coquus. Cum Eudone quoque de Blazone, quando nobis quod fecerat Gimo, suo firmavit auctoramento, quod scilicet in nostro capitulo fecit, die quadam qua nostri benefacti participationem accepit affuit Hugo cognomento Manduca Britonem, et Petrus filius Cadilonis de Blazone.